

香嚴尚書壽言  
合肥相國壽言



香嚴尚書壽言

袁昶撰

王雲五主編

叢書集成初編

香嚴尙書壽言及其他一種

中華民國二十五年十二月初版

撰者

袁

昶

發行人

王

雲

五

上海河南路

印刷所

商

務

印書館

上海河南路

發行所

商

務

印書館

上海及各埠

徐

集



叢書集成

初編

主編者  
王雲五

商務印書館發行

本館據漸西村舍  
叢刊本排印初編  
各叢書僅有此本

# 香嚴尙書壽言

香嚴尙書督部大公祖大人六十初度壽序代

皇帝嗣位之二十年九夏清宴金甌无缺海外諸國珠槃玉敦互通信使喁喁嚶嚶懷柔率服莫不享賈  
劑通約之利戒輕生邊衅之害不意東鄰責言亶洲盜弄蜻蜒列島屢逞陸梁馬訾東西遂困多壘士皆  
投袂將奮同仇廷議以坤一久歷戎行粗嫻弢版推擇閩外俾視師榆關管北門之鑰而南洋諸海口島  
嶼鱗比尤防侵軼非有威重大臣將何以綏靖而鎮撫之蓋當氛祲倏擾之際苟無恢張應變之方略則  
患生肘腋縣官軍實悉仰東南稍有侵陵杼柚立竭則前敵諸軍雖有帶甲百萬金城千里湯池四塞而  
無粟無械其將何以持久故節鎮綦重征繕攸資苟非親臣重臣何以堪此宏寄聖上知人之明謀帥之  
慎特詔移香濤尙書督部大公祖持節蒞止俾坤一得一意星征戒途率師援北倚公爲江介長城驂斬  
輯結嚶羽代飛使節旣至雄規茂略風發泉涌儲峙芻菱製購仗械招募期門材官習流精手之屬訓集  
百餘營北溟大軍南鞏海防一以多算勝少算粵稽成案雍正乾隆中準部青海兩役大軍出玉關而以  
劉文正統勳督關內芻菱軍火蒲昌戒斥候而以黃文襄廷桂綜後路軍務精臺聖主知人善任乃眷股  
肱倚公深矣旋以兩國棄前嫌修舊好囊戢甲仗置場救平奉命各旋所治上流重寄惟公克肩其任而  
坤一承望下風亦得以勉勉奉職互相規隨焉今年秋八月爲公六秩攬揆之辰先是歲在丙戌公持節

交廣。年正杖鄉。以仕履官。年差一歲。至丁亥秋。乃拜御書編額。西藏銅佛。純綺御物。如意珍果之賜。阮儀徵賞。頤性延齡之勝。史文靖冠御筵千窆之班。今茲杖國明年。合拜異數。而同官之義。自應先期爲卮酒難老之祝禮也。公敷歷京外三十五年。每遇生日。輒援亭林顧先生之例。杜門謝客。從不以樽酒宴交舊。公服古之義篤矣。然歐陽文忠年三十。官夷陵。遇生日。賓酒舟中。作詩自壽。幽風有躋堂稱觥之詠。漢賜三公爲老更者。上尊之酒。靈壽木之杖。梯几。乞言之儀。生日頌祝。其來舊矣。况乎然明國僑之義。虎帥以聽。當此元封文武名臣欲盡之時。祝公長生久視。老復丁壯。摯挂龜塗之局。幹維屯蹇之運。此人人之公心也。事有共塗。忠言相告。世教寢微。冀共扶獎。懿戒大年。進德匪懈。此又朝野喁喁屬望之私心也。稱祝之詞。僉曰宜哉。夫經綸艸昧。篤生異人。根節盤錯。乃別利器。公昂宿垂芒。德星應曜。綺歲馳神童之譽。壯年揮經世之業。掣精六略。范氏墨帳。輸其勤。甄綜九流。何氏學海。遜其博。少秉贈太僕公義方之教。贈公與益陽胡文忠公簪仕黔中。同官雅故。公就受學問。講求經塗。發解之日。文忠遺贈公書云。賢郎得解。與韓南溪開口而笑者累日。後公督鄂。謁文忠祠。作詩有敢云驚鈍能爲役。差幸心源早得師之句。是見公之德器。公以巍科列侍從。天下仰爲文章山斗。今上初元。吳柳潭侍御。痛念程廟上賓。於繼統卽繼嗣之經誼。猶有所疑。抗疏激烈。事關大典。盈廷集議。無所依據。公獨据公羊儀禮經文。仰稟裕陵御批通鑑。御製文集。平定陶漢議興獻之閔。折永叔溫公伊川之衷。詳繹詔指。傳以經義。羣言糾紛。大禮遂定。追維同治末年。大婚樂章房中三奏。又欽定平粵捻方略兩次表文。出公手撰。詔賜加銜。此安石之碎金。於平生

爲末事。天顏稱善。輒曰：奇才、奇才。是徵公之榮遇。公少服膺河間儀徵兩文達之書。於羣經六藝九流百氏無所不窺。潭思挈精。尤熟史事。典試視學。所至以行學文刊刻條教。蒐勵真材。曾文正嘗歎爲朱筠之視皖學。洪亮吉之督黔學。阮芸台之視浙學。無以踰也。自蜀輟歸。愈潛心宋元儒書。服習朱子。製行修辭。非法不言。非禮不履。浙蜀嶺鄂。經公傳車所歷。翺立經心。尊經廣雅等書院橫舍。口講指畫。四學之目。兼通時務。明體致用。本末兼賅。九能十二材。雲蒸霞蔚。儲爲國器。樂育羣倫。陶冶萬士之意。至深遠矣。是徵公之學術。光緒庚辰。丁令違言。行人失指。天山西徼。蒙部北庭。速賓東境之地。將爲珠厓。議棄鄆。謹不歸。公十上密疏。規陳方略。旋以曾惠敏充使華離之地。劃回職方。兩宮懿旨。特由監局擢公講讀學士。象胥署有大議。輒敕王大臣使公預聞參署之。此公上結睿知之始也。泊乎撫晉。密薦文武忠良材幹五十九人。多見采納。不次擢用。開府兩廣。防海規越。與彭剛直同心戮力。疏畫方略。電奏機宜。公輒主稿。兩銜拜發。彭公未嘗不稱善。泊乎桂撫徐潘相踵僨事。當是時。嶺西岌岌。太平歸順南甯等邊郡。潰兵紛紛劫掠。兆人瓦解。公密薦以臬使李公秉衡署巡撫。扼龍州南關之險。預籌軍火餉需。密奏派馮軍門子材。王總兵孝祺。重整勁旅。禡牙出關。軍聲大振。於是有諒山之捷。拂箠爲之震恐。其外部首相茹勒斐里。乃力持脅戰索償者也。竟爲法人議院所劫退別。公舉首相。翻改前議。遂乞行成。爲自有交涉以來。戰功第一。是役發軔指示之功。人公實主之。而推獎諸將。口不言功。乃尤人情所難能也。瓊雷欽潮虎門橫檔大角沙角。大築礮壘。相度險要。仿造西制。屹然巨防。軍火之廠。樓船之務。器師畢陳。巧匠咸集。杜預武庫之稱。葛



亮連珠之製。無以踰之。是徵公之軍謀。毛詩傳云。治民煩則亂。烹魚煩則碎。又語云。十羊九牧。羊不得食。人亦不得息。言不諳治體者。務爲煩碎。則扞格而不可行也。公撫晉之日。禁栽鶯粟。惟嚴查於播種之時。而三時則否。治井陘道。惟預籌以官款興工。而不擾民捐。治粵。則沙田之事。挫豪強。抑兼井。開瓊州黎母嶺十字路。兵民相安。閭井不擾。鑿銅青硫煤各礦。爲民興利。爭新香六廠急水門之洋藥。緝私不宜授柄於人。治楚。則水旱以時預庀荒政。修荊州大隄。親督樵薪之役。樊口梁子湖。力主不可妄設開壩。致受水之區太狹。橫溢爲災。是公之於政體。能導其要領。而溪壑不苛也。烏裔互市。新法大開。詆之者不曉變通。溺之者目迷彼法。不知我之所短。禮失求野。彼之所長。蛾術可師。公創立自強學堂。以算務格致方言製造課士。而籠鐵官自然之利。徐文定所未行。鑄銀幣以他拉爲式。林文忠所未竟。立紡紗局織布局。以塞无窮之漏卮。開槍礮局栗藥廠。以資有備而無患。是公之於時務。能觀其會通。而化裁盡利也。爲大府者。厓岸太峻。則上下之情閼。藩牆不設。則督責之程弛。太剛則折。太柔則廢。文武之道。一弛一張。神而明之。視乎人矣。公官人有法。隨器授任。鼎不可使柱車。馬不可使守閭。言殊器也。千將不可以苴履。明鏡不可以爲甑。言殊用也。公處置庶事。爲地擇人。取將於伍。後常名顯。收士至佐。惟邦之彥。履屐之間。皆得其任。文武孝友。有治內治外之各宜。公入告嘉謨。以此薦賢。爲國亦以此。有時楚材晉用。西將中求。遠規由余金日磾之例。近羅戈登日意格之倫。巧匠材官。多方招致。機廠練軍。次第設施。故選才不拘一格。而藥籠常資兼收。是公之陶冶一世。造就大雅之材也。惟天下之至靜。乃能觀未兆之形。惟天下之至神。乃能弭

方來之患。公上疏力陳。海軍當分南北。閩粵洋爲四大支。若預知有遼東元菟之役者。力陳鐵路當以蘆漢爲正幹。晉陝爲旁支。若預防海州膠州要害。恐爲敵侵。東路轉運。易被阻襲者。在嶺嶠。力陳銀元局鑄錢局之利害。若預料今日錢價涌貴者。公連珠詩云。吾聞淮南子。澹泊以明德。又云。吾聞周易象。自強爲要領。又曰。吾聞齊扁鵲。治疾恨不早。公之建白數十上矣。而施行未及其半。志事猶未盡伸。晉賢每歎事不如意十常八九。然哉然哉。是公之獨居深念。靜觀萬物之理也。坤一責厚事叢。年運而往。自問鷲鈍。豈稱與天馬並驅爭先。惟此殷憂時局。忠赤報國之意。竊不自揆。與公若牛鐸之應黃鐘。昔林少穆、鄧嶠筠當粵衅驟開之時。互相忠告曰。所不同心者有如海。今艱屯之運。視昔倍之。而康誨之圖。志奢遇詘。公將以明年八月賜壽。稱祝之詞。不敢虛美。敬舉其瑩瑩大者。以厲詩人祝難老之義。勸公三酌上尊之酒。而莊敬日強。進德不懈。如衛武公九十之年。作懿戒之詩。以自儆敕。孳孳未已。是則區區所頌禱者。夫公聞之。想爲欣然。晉一卮也。



張大司馬壺公師六秩壽序

皇帝踐阼。承穆廟中興之政。歲星再周。嘉與二三股肱臣。龜涉屯蹇。黼藻隆平。風輪南戒。闢黃海紅海黑海而遙。璇極四游。綰太易太始太初而運。滄溟蕩蕩。迴瀾仗康世之心。組柱義義。陶冶試補天之手。則必有盧牟中外。暉滌山川。氣備四時。壁立千仞。征南偉爲武庫。潞國敵妬異人。鄭公龜鑑。決君國之大疑。苦縣龍猶。倖至人之無已。然後煙燼九夏。繁憂樂乎蒼生。經緯萬端。佐平成於赤縣。芒垂昴宿。學爲海宗。其惟我南皮尚書壺公夫子乎。公孺疇道真。嘯歛元綽。譽譽棐忱。貫櫟璣序。粵溯歲在丁亥。持節交廣。戊戌年

五十初度。因仕履。官年差一歲。故丁亥秋乃奉敕賜壽。

其時公年屆杖鄉。秩爲始滿。

天家錫羨。馬人頌德。

奎章粲爛。佛像莊嚴。

放靈壽九節之筇。賜上尊十酸之酒。杜鏤帶其焉榮。蕭繡像而已蔑。越歲丙申。八月初吉。爲我公開第七秩攬揆之譽。風行漢廣。星朗弧南。刁簡公瑞嶽之雲。上方霖雨。高伯恭德泉之府。內暎文明。祿亥萬千。炳中朝之舊德。蠶牙十二。拜黼座之新綸。自影纓高蟬。刺蜚蠹。南棠東社。貉隸象胥。並續筵宗模。鏤助雕壤。洪惟我公。八咸一德。出督八州。領治內治外之耆名。搢足食足兵之本計。目營四海。而智蘊不極於用。道母羣物。而履屐各適其材。占隆棟於中台。繫宗臣之上瑞。寒松賜榻。魏環溪特拜御書。頤性天題。阮雷塘將膺枚卜。粵源贈公僕卿太夫子。鶴載牂柯。豸巡羅甸。戢米魯阿之焰。紐鐵貫山。鐫武鄉侯之助。鑄銅

伐鼓穹碑恩大。新蠻落之生祠。沈石風清。祝侍郎之昌後。僉以胚胎世惠。麗天星精。耀燭神光。誕祥有自。旣而家傳魯論。傳就河汾。於時贈公與胡文忠公同官雅故。公奉爲本師。性銘忠孝。芬揚廿歲。志在汗青。遂乃天下已任。大略獨觀。開函九羊。憶書三篋。金鑠珠囊。機鈴流略。讀破景丁四部。目窮文史三冬。溫公無警枕搗頤。錮峻有焚膏達旦。泊乎士衡入洛。蘭成策科。上第鳳雛。摺白沙之老眼。一聯鼇背。屑紅燄之瓊牙。動色相趨。忠肝古誼。益復飽閱中祕。粹擷綱維。王儉之改編七錄。褚亮之傑直三番。平當論議通明。楊億典章洽孰。嘗榜座右曰。兵家盡補能康世。經義咸明迺著書。拜文忠公祠詩曰。差幸心源早得師。其蘊量閎達有如此者。杜史寢敷。狐簡已遠。或則索千斛米。或則劫百鍊金。公正例變例。涑水探源。才優識優。中壘定論。潤色則西京鴻業成一家言。低徊於南史麟編。發三科旨。揚子雲贊太史公書云。不虛美。不隱惡。據事直書。無一曲筆。吾師有焉。又況曠日九英。舉筆規諫。淮西奏雅。直揜貞符。雖樂鳴絃。聿宣風始。仗燕公有大手筆。非西鄂誰鍊都京。於時館臣恭進欽定平粵平捻方略表文。皆公擬進稱旨。磐陀老人直內廷。多經進之藁。琅嬛仙館大著作。爲衆手交推。去彭芸楣之尖新。斥胡石笥之苗軋。祕殿之炬撤金蓮。講筵之書幃錦帕。抒思對命。潭慮挈精。其雍容侍從有如此者。然此猶朝夕論思。而非日月獻納也。聖上改元之五載。疇諮大禮。魯信少儒。國論蘊茅市殺一闕。公議斟禘祫。炯如韓退之之精。論挾尊親。根據公羊高之誼。平永叔溫公兩疵之同異。折定陶興獻諸議之紛縝。贊定典章。以肅以穆。越明年。丁零之北。睨我西陲。脅我擅使。留翠桐熟。頓寒諾水之盟。斗入碑沈。妄覬造陽之棄。商於挾詐。甌脫思侵。鼉飛羽書。

夕嚴狼望。公四策指陳。十犯手上。謂皮山應回漢節。豈介子怯斬樓蘭。薛米思干非算灘之敢據。木素爾嶺。矧穹趺之早封。尋復密奏。以曾惠敏改持英箚。重使穹閭。帖克斯川之境。挈隸職方。阿爾泰山之陰。畫歸亥步。自是聖上眷公可大受也。迺命以待講宣力。凡譯署議交涉款約。必令公預聞參署之。頗牧近直禁庭。留侯密贊前箸。威老上之龍庭。折撻犁之驕子。且渠語塞。尺一書尊。同異兩科。利害三策。古所謂戰勝廟堂。折衝尉候。縱橫版神。清氣勁。朝野賴之。至若呼蘭木葉。烏拉紅鹽。了角米脂。那顏統萬。兵與屯爲互衛。戰與食其交資。祕焚諫草。外廷莫知。筴預綢繆。中留乙覽。其獻替軍謀。有如此者。昔在中葉。士習敝陋。祿利歧於天監。文儒競於永明。切直刊於太和。嶮恠積於嘉祐。天子以公甄鑒似韋陟。清介似高郢。公明似退之。淵洽似長公。遂命出典濶科。督鄂學。蜀試甫竣。星輶復留。自凡海曲瑩珠。荆巖蘊璞。羽獵上林之彥。碧雞金馬之倫。一角磨成。萬飛鳳接。驂駒翦拂。藥物籠收。唐代陸贄。宋世歐陽。方之我公。殆猶遜嫩。況乎齋規安定。炳斯文江漢之靈。院拓文翁。錄絕代輜軒之語。囊括百氏。條別九流。方諸先輩。朱笥河之視皖學。阮文達之視濶學。洪卷施之眎黔學。宏獎人倫。別裁浮僞。使相湘鄉曾公。嘆爲百年以來。得公兼而四之。知言哉。其蒐擢英才。有如此者。抑聞傳經賈董。不儷績於漢侯。相士韋錢。未巡方於唐部。沈詢清粹之望。乃重旌旄。盧鈞台閣之風。始班節鉞。公以清切之近臣。試股肱於右輔。當開府山右之日。歲祲水木。星留荏華。迺响以蘇甘。穀我士女。崎嶇阪折。夷治井陘。綺錯溝塍。盡薈鷺粟。吏則鵲鶉珠濯。民則蟋蟀恩銘。已而置理百粵。葆障炎維。靖窟嘯於狹徒。控市司於番舶。蜚戶魚姑之糅雜。疊帆蜃閣之迷離。黃

木扶胥。神靈飄雨。蒼梧勞竹。巖嶠捎雲。待剗廉平。並勞風曉。公下車之日。鑄陶瓦以代諭。滌簠簋使更新。采柯籩而奠六瀧。絕樗蒲而運百甃。遂令珠源復返。金粟如塵。絲蚋班牛之族。警息蒲牢。閣婆柔佛之賓。候迎雁訊。極則鑄銅爲柱。礲則表海成臺。丸泥鞏而鐵牡封。嶺嶠龜而長城屹。粵臺大治。鄂渚後來。控襄郢於上游。吞雲夢者八九。引臨江之沛艾。衆戴番君。揚破竹之新硯。人謳杜父。功砭息壤。執捷薪湛玉之勞。厥課定秦。樹流枿蔽江之略。開軍器監儲十遺十決之佳兵。績營陣圖震九地九天之妙略。籠山川之礦利。冶自躍金。肱壇殫之精鏐。地不愛寶。大興紡織。衣被者百億萬家。議塞漏卮。鑪錘者三十六冶。比者朝廷念潢池之弄兵。顧江表以謀帥。特太真不動聲色。得道濟賢於長城。于時劍及蒲胥。桴推壯武。聞命卽行。先機設備。彼縱跳波島鯨。我能奪水鯨鯢。健吳淞之筦鑰。大好衿喉。扼淮海之碣臺。屹然天塹。虎符十二。銜羽檄以橫飛。犀甲三千。鏑海波而不動。奔車雲屯。築墨翟子九攻之壘。沙隄繩直。闢盧龍山八達之馘。轉徐方而漕餉。丕靖驛騷。挽銀河以洗兵。旋遑節鎮。人以爲難。鉅不避者。公之忠。公以爲勤。勞自矢者。臣之職。俄而庚桑蒞楚。頌十年畏壘之穰。申伯還南。歟四牡鉤膺之濯。還我大父諸兄。汾陽僕射。奉爲四時八節。長生太師。其迴翔量寄有如此者。然而文貞竹瓦。未警瑋牙。鐵建旌麾。僅馴党項。繫昔甲申之春。公自晉祠入朝。會值交州構衅。造鄴陳謨。對揚六刻。險度方略。虜盡目中。泊拜命督粵時。則岬生滿月。海沸吹沙。殺獬欲飛。鯨鯢不靖。將軍大樹。方迷衣錦之雲。羅刹重潮。待穀射蛟之弩。覬南關而欲上。替戾岡催。阻東道以難通。富良江關。公奏進羣材。師行席上。昕夕與駐粵欽使彭剛直公。圖山聚米。饗士張燈。

密薦文武羣材。力抗陸梁強寇。資李藥師之齋糧。護院李梟使。立糧台於龍州。蹙禽頡利。策馮奉世之善馬。宮保馮奉世。

陣斬沙車。督王鐵鎗跳棘如飛。北海王鎮。李祺。嗾蘇總管冒霧先捷。蘇軍門。老熊當道。不教貉子生還。下瀨聲援。

兼檄樓船暮會。納居翁以諭甌駱。畫荒徼而靖旄牛。韋皋之度鐵橋。狄青之障銅具。飈飛屋瓦。雨洗炎州。

斯則象輶吹鏡。凱樂之章大奏。未有鯁人懲創。翎侯之徒灰寒。若此役者也。語在克復諒山記略中。爲自

有交涉以來。戰功第一。待鑄石於活厓。中興作頌。勒戰功於服嶺。異域來庭。公之建樹闕矣。至乃孤懸瓊

島。與海通波。儋耳崖深。老閉關之大長。昆耶山險。窮帕首之韓刀。豈知黎母置開。蟲沙淨洗。椰冠化拓。蠻

觸休爭。火種刀耕。洗滌大藤之峽束。銅青石綠。轉輸富媼之治官。奠錯午於尾閭。關夷庚於指畫。若其鑒

車鳥了。奪靈昆那。赤崁佛書名。昆舍那。憤河伯非外孫。義田橫爲壯士。暗輸犒粟。屢漁軍資。雖朱厓終棄。隔中星正

朔之放。而維州追論。惋悉怛垂成之績。是尤江左夷吾。收新亭之涕淚。貴和葛亮。蓄雄略以未伸。其規畫

武功有如此者。且夫關東部洲。未有之利權。塞九瀛海。無形之厄漏。隴種羊而吉貝移於中夏。地用馬而

白撰溢於漢家。肄陰陽權謀。形執技巧。以屈繚直。象由余於戎服。萃七陶八冶。九柯十匠。以開監作。據縮

轂於漢皋。飛車則幹徹奇肱。圖法則翹新尙父。楚材晉用。西法中師。河圖播地。啓八萬里二三級磐石之

精。遁甲開山。驗十九施。廿五種孳生之產。氣函嘯噓。質辨阿屯。佛郎湧而森興。連珠環而山積。旁羅日月

星辰。水波土石。莫富軒轅首畫之區。贊翊兵刑水火稷契工虞。實翊媯聖中天之治。其損益也。則取材落

實。利用前民。其挾張也。則四徹中繩。九變復貫。曾文正之深心偉識。胡益陽之體國公忠。公眞淵契哉。其



匡時局有如此者。若夫戛蕤賓之律。感而應商。淬昆吾之金。求而躍冶。謝三字語掾。一節見則百節知。羅卅六英雄。注意相并。注意將。廚及魚龍之藪。郢輸棠桷之歸。士求異等茂才。學貴通曉世務。橫韓潮州之校。遠包鹿院全槩。育黃江夏之材。勝闢雞籠四館。真性通而氣厚。俾雷奮以雲興。至若茂宏練服。迂安布衾。屏伏波薏苡一車。載武惠圖書萬卷。飲建業水。投錢而導六騶。食武昌魚。封璩不遺一鮓。後堂無家伎之奉。丈室有青絕之帳。攜獨樂園之竹杖。飯窮塞主之蠶鹽。起樓臺以無地。遠人問寇相公起居。鑄寶氣而不私。國論服賈昇州清介。簿書手校。罰二十以上必親。木屑親儲。課分寸之陰日。篤心似當天白日。胸無深阻。樊榭。淡言。暝帛臺。响座客以登春。謫語生雲谷。接才流以應律。其陶冶羣倫有如此者。況乃門千戶萬。典治朝章。龍矯蟠騰。儀占地動。一品會昌之集。千秋金鑑之編。汲鵠孔堂。證湛深於高密。上庸嚴季。隘集古於歐陽。何止連珠製。君苗筆硯都焚。詎知碎金曲高。太傅餘閒偶事。公之雅志。在曲江風度。贊皇方略。然無心競物。鷹隼休猜。大營平泉。中冷水遞。曲江有性韻。而短於武功。贊皇挾才氣。而微嫌汰侈。公乃集其兩長。去其兩病。後人尙論。定以鰕生爲知言哉。昔在扶陽就侯。元常杖國。令公領笏。文穆醕觴。雖語祈淪。并彰汗牒。然以視我公。志薄風雲。性超始素。籌優禁幄。柱亘擎天。他日玉瀾堂裏。敕績儀形。千宴宴中。首廣進御。埽埴埏紃。斯獨鑠矣。助伐鐘萬。俟其禕而。剗桐出爨。琴爆尾而不焦。汗竹傳經。酒登堂而拜賜。元成公子。研席連跼。朱游門吏。大桁識路。跂門風於鐵漢。豈任傳衣。駐旌節於赭圻。叨陪曲讌。竊惟當陽智囊。朝貴或阻其勝算。長沙舞袖。狹區未足以迴旋。史稱謝文靖大人之容。王公之度。而寢